

La Quotidiana 15-11-2013, p. 8

La regenza refusa l'ordinaziun davart Dublin III ed Eurodac

■ (cc) La regenza grischuna prenda posiziun davart la realisaziun da l'ordinaziun davart Dublin III ed Eurodac (ulteriurs svilups dal dretg acquistà tenor Dublin/Eurodac). En il rom da la cunvegna davart l'associaziun a la reglamentaziun da Dublin tranter la Svizra e la CE è la Svizra s'obligada da princip da surpigliar tut ils ulteriurs svilups dal dretg acquistà tenor Dublin/Eurodac. Las disposiziuns legalas actualas correspundan il pli savens gia a las novaziuns ch'èn vegnidas deliberadas sin plaun da la UE. Punctualmain pretenda la surpigliada da quests ulteriurs svilups da la reglamentaziun da Dublin/Eurodac l'adattaziun da la lescha federala davart las persunas estras e da la lescha d'asil.

La regenza grischuna refusa claramain las novas regulaziuns. Ellas avessan numnadamain per consequenza ch'i stuessan vegnir abolids u ch'i daventassan bler pli cumplitgads ils instruments ch'èn sa cumprovads en il sector da las mesiras repressivas dal dretg da persunas estras. Ultra da quai profitan persunas estras che sa cumportan en moda renitenta u abusiva da la garanzia da la via giudiziala planisada, sco per exempel da la limitaziun da la durada maximala da l'arrest d'expulsiun en cas da proceduras tenor la reglamentaziun da Dublin. Plinavant vegn restrenschi en ina dimensiun che na dastga betg vegnir sutvalitada l'agir dals chantuns ch'èn incumbensads d'exequir speditas.